

Kloschterräbe-Schränzer

Dr Schlangefänger

E Flohmärt-Bricht

Hesch uff em Eschtrigg alte Grimpel,
denn gib dä Myggis meeglisch bald
em Flohmärt. S'kauft e mänge Simpel
so Saich bym erschte Schtaatsanwalt.

S'git in dr Schtadt au e so Gschalte,
so mys und lusch und fuul, bygott!
Me sott die nimme lenger b'halte:
Mir mache-n-eych e-n-Agebott:

Fir Schportfanatiker:

Mer hätte Pögg und Gnocheschooner
und Lybli mit em grosse «B»,
drzue no ungefähr fuffzäh Flohner,
so billig griegsch die niene meh.

Fir Kunschtsammler:

Mer hänn e Lukas-Cranach-Rahme, --
s'Bild het ein gfulze, sone Dropf, --
doch mit de Wirm im Rahme kame
go Nase fische-n-am Birskopf.

Fir Botaniker:

Mer kennte schliesslig au entbehre, --
e mänge hätt do dra sy Gnuss, --
mer offeriere dane Heere, --
die ryffi Fyrwehr-O-Ber-Nuss.

Fir unsri Glaine:

Und jetze no fir unsri Binggis
Sinn d'Drämlig vo dr Be-Vau-Be,
Die gheere-n-au zuem alte Minggis,
no muesch si nimm entglaise gseh.

Fir dr Muusigfrind:

Mer gänn dr Wurlitz-Torriani
fir billig Gäld - fascht gratis - här.
No besser wär's, wenn dä Schnulzani
fir ganz in Moskau blibe wär.

Fir dr Theaterfrind:

Mer hänn zue widerholte Moole, --
er gheert scho bald zuem Flohmärt-Schtamm, --
ain, wo me jetz fir ganz sott hoole,
dä iberzahlti Schrammel-Schramm.

Hygiene:

Wott ain is wägem Abee ruffle,
no muess er sälber sauber sy.
Dä Sullo, wo bi uns duet schniffle,
dä gämmer gratis obedry.

Fir Glaibasler:

E Zwätschgekopf-Profytti-Jeeger
schtellt s'Eglisee in Schatte halb.
De kasch dä Wulleschleeger-Leeger
ganz billig ha, das Lattekalb.

Fir's Comité:

Dä Kaffisagg uff dr Blagette
isch au e ganz e miedi Sach.
Begriff, dass mir dä sofort sette
verkysche samt däm Afflerbach.

Fir d'Regierig:

Au d'Gaischterburg vo de drey Ehre,
dä muffig-fuuli Ahnesitz, --
dr ganz Glimbims mitsamt de Heere,
verquante mer fir zwanzig Schtitz.

In memoriam:

Zuem Schluss do hätte mer no z'biere, --
s'isch klar, dass mer si billig gänn, --
die letschte Pfalzbadhysliniete,
wo dert als s'Fidle g'schbienzlet hänn.

Fir dr Plebs:

Und wenn de wotsch d'Ladärne b'schaue,
so kasch si in dr Muba gseh.
Fir d'Wäge muesch's scho wyter haue:
ins Lädeli vom Comité!